

Yoxrdaxl Sul

1

¹ Ngo mel Yisu Zidu leil miar bei gger su ca Yoxrdaxl a; Yargel ngua nnel mel arzzi-nimar a. Nia mel Arbbor Arbosobo tiur teixl lei a, yar perniar dae, nei Yisu Zidu guaxr dae ca mel a. Ngo nia leil xil vaexr gger.

² Arbosobo leil nia leil yarzi sael zoxlnixr lol nia, nixmox yarzi sael zzaso lol nia, yarzi sael perniar lol nia.

Sulmulsu Yarjiar Leil Faxr

³⁻⁴ Ngo perniar dae arzzi-nimar arzzi-nimo mel, ngo yarzi sael nia leil xil vaexr gger a, nia dax Arbosobo niul leil arsae jiuxl hal mel leil biar niazzir. Nael Arbosobo leil i nr du ca armel a arjjiuljjiu a nia ca mel gga hher ji dae ho a. Yaa bbeix, Arbosobo niul leil ssoxrsuxl ho a, niul capor ssormaer zzi dax buxlguaxr-laxlsixr bei a lei nr zzi. Yaa halae Yisu Zidu mel niul ddei Seirpor; niul leil guaxr su ddei nga a; eine nr ssexl. Yaa mel hherdder Arbosobo arddol-cirsil dder yaa leil faxr nia vaexr har zaxr dae ca hal mel nga a. Yel ngo nia leil xil vaexr gger a, nia leil quex, halleix Yisu mul gger mel zabbar seilseir a ddarzzi dae nia, si nia ddarzzi dae mel leil nrbba nrbba bbeix a lei, nia yaa leil bbeix lol nr ddo. Nia ca mel leil Yisu ddei ddarzi mel mul gger nia. Yisu nia leil mul gger a nia ddarzzi dae mel mel, hherdder Arbosobo yar ddei cassor-worssor leil ddarzzi dae lol mel nga a. Eil mel mel gierbox nixixl nr zza cirse-cirsil zza dae var.

⁵⁻⁷ Nia holcir dae nia, halleix Seirpor yar ddei cassor-worssor hherdder Yirsaexllixl su ca mel leil Aezixr goxrjia gga jiuxl teixl lei a; nael giedae yaa ca mel gga yar leil ddar-nr-zzi su armel zza a, Arbosobo yaa leil bei zil gger a. Tisir cirmelmel a Arbosobo leil dir a, yaa bei nr ddo mel bei,

armael hher ggie lei nr hher. Seirpor dder hexsox sser a, cirse-cirsil lei yaa leil neixmar ggie zzux gex ji dae a. Yel serpaxl nixixl ddei ci a, yaa leil faxr nia. Halae Sordomar zzi gga ca, Exrmoxrla zzi gga ca, nei zzi eil rnel dax naer dae kax hal mel gga ca mel lei tisir hal mel sael a vuxryixrddo. Yaa capor ssormaer zzi dax kerjia, halae capor car capor, ssormaer car ssormaer lei buxlguauxr-laxlsixr bei. Yel Seirpor dder adoxl sser a yaa ddei zzi mel cu pixl gger a. Seirpor eine bei a mel, eilni-arggeni cassor-worssor mel leil saexl lol, arseir Arbosobo ddei ddar nr no a mel, yaa leil bbiu zil nixixl nr zza adoxl mel gga piar ji gger. Eil mel nia saexl bbeixarnar, nael ngo halae nia leil bbeix gger a nia leil holcir dae lol nia.

⁸ Ca eil mel sael a, Arbosobo leil ddar-nr-zzi su arjiuljjiu-arla nia dax hher dax dae su ca hal mel mel meixcir mia a, yel capor ssormaer buxlguauxr-laxlsixr bei a, yaa ddei ggecir ddei sei-nr-beix loxr a. Halae Yisu ddei quexrlxl mel leil i zei, merhhexr gga bbobolbbo zza su mel leil bbeix vuxryixr. ⁹ Nael tisir mel ddei vaerzzirpor Mirjialexl mi tisir hal ddei neir zzirmar te dax Moxrxi ddei ggecir ddei leil zex car lei, yar neir zzirmar te leil bbeix vuxryixr nr bel, goxl nr bel. Yar bbeix: “Seirpor ni leil faxr lol nia,” eine lar bbeix. ¹⁰ Nael ca eil mel mel yaa nr saexl hal mel leil bbeix vuxryixr bel. Yaa mel hherdder zzeir mel sael a nga, azo bei niazzir dae dder azo bei. Nael yaa bei dae eil mel mel yaa leil ke zil gger lalnga. ¹¹ Yaa Gieyir mi ca hal ddei yarzi gexrddo bei goxr mel sael a bei. Yoxl zzirbae meixr a, Balaxr mi ca hal ddei sael a zuixl mel bei meixr. Halae Kerla mi ca hal ddei sael a, Arbosobo leil dir a si nia. Yel yaa zoxr a! ¹² Ca eil mel nia dax cirgo a zzo zzor a seixlda nr saexl, nia leil ca dax toltor nr bei lol. Yaa armael leil lar guaxr, ya leil nr guaxr yaloxlmo hal mel sael a nga. Yaa mel zico mel leil mersi jia kae gger a, almer lei nr var sael a nga. Yaa saerniarzi saer niar nr var saer zzei mel sael a nga. Yaa

yarji jiujiu giexl teixl lei a, si zil gaxzi sael a nga. ¹³ Yaa yarzi seixldaddo bei dae hal mel mel hherdder neixvi gga mersi daxlgaxl jia a bu du lei helvi mel sael a nga. Yaa yoxl ssicixl-ssige gie mel sael a nga. Yaa cirse-cirsil lei Arbosobo bei har zaxr dae neixmar zzir halmaex gga de ji nia.^a

¹⁴ Yalda giedae ca sir zeix gga Yirnoxl mi ar ddei zza.^b Yirnoxl ca eil mel leil bbeix zaxr goxr a bbeix: “I dae la ddo a. Seirpor mel yar ddei seirceix-seirmaer tisir hormo du hier dae a, lei a. ¹⁵ Yar ca maelmaerjjia leil ser lei nia. Yar leil i nr du su ca mel yar leil dir a zuixl bei halae yar leil bbeix vuxryixr ddar hal mel te, yel yar ca eil mel leil zuixl dixl gger nia.” ¹⁶ Ca eil mel mel halae zoxlzoxl a boxyox doxr, si leil curcix, armael nr seir xiar dae mel sael a bei ssi, armael ddei armael yarzi kuarddo. Yaa yoxl armael ddei seirggiebbae tuxr a, ca leil kuar gger.

Yisu Leil Ddarzzi Su Mel Leil Quex

¹⁷ Nael ngo perniar dae arzzi-nimar arzzi-nimo mel, nia niul ddei Seirpor Yisu Zidu miardal dae ca mel ddar bbeix goxr mel leil holcir dae nia. ¹⁸ Yaa halleix nia leil bbeix gger goxr a bbeix: “Nixixl maelele ddei gga Seirpor leil vaessi su ca armel ddux lei var. Yaa nixmox zzar nr seir xiar ji dae mel dax zox dae a bei.” ¹⁹ Ca eil mel mel nia leil zzi dax zex lol, yaa xiar dae mel mel, armael nixmox ddei dax zox dae lalnga, Arbosobo ddei Xiu ddei yaa dax hher nr ji dae. ²⁰ Nael ngo perniar dae arzzi-nimar arzzi-nimo mel, nia Yisu mul gger dae mel leil ddarzzi doxr dae a, ho bei ho yar dax bei mae dae nia. Arbosobo nia leil Yisu nei yar miardal dae ca mel mul gger dae hal mel saexl lol. Nia Arbosobo ddei Xiu ddei leil koxl

^a**1:13** Gie eil mel mel ca bar-nr-ver hal mel leil bbeix. Ca eil mel leil koxl nr cexr.

^b**1:14** Cuaxlsixljil Sul 5 leil yar leil biar dae.

dae a, Arbosobo dax ddar biar nia. ²¹ Nia Arbosobo dax hher ji dae a, yar nia leil perniar a nia lixrcixr nia. Nia Seirpor Yisu Zidu leil xia dae a, nia leil zoxlnixr lol, eine nga a mel yar nia leil cirse-cirsil lei yar dax cirgo a hher lol.

²² Nael nixmox zzar ddarzzi gax-nr-zi su ca mel leil mel, nia yaa leil zoxlnixr nia. ²³ Kebal ca cirmelmel leil a nael, nia yaa leil cirse-cirsil bbiu zil nixixl nr zza adoxl^c gga ddir lol nr ddo jiuxl xixl lei nia. Halae kebal ca cirmelmel leil a nael, nia yaa leil zoxlnixr nia, nael nia yaa leil fadae nia! Yaa zuixl bei dae mel leil vuxryixr nia.

Arbosobo Leil Bbeix Zae Gger

²⁴ Arbosobo mel nia leil guaxr dae a, nia leil de nr zei lol, hherdder nia leil beijjiu a zuixl nr bei lol. Nia leil botaddu cirdoxr lei nr zza seirceix-seirmaer, ggegge-sese arla yar meixsaer qier leil ngier dae lol. Yar mel bbobolbbo zza. ²⁵ Arbosobo mel cir ddei lar zza. Yar niul ddei Seirpor Yisu Zidu leil niul leil jiuxl lol. Yel azo lei nr zza seir cirdae a eilleix zzezze halae cirse-cirsil lei yar leil middux lol nia, quexrlxl zza lol nia, cirza-hanga yarzi ddo lol nia, zzirmar ddei Zzirmar bei lol nia. Amae!

^c**1:23** *cirse-cirsil bbiu zil nixixl nr zza adoxl* Cirse-cirsil bbiu zil nixixl nr zza adoxl mel dder dixlyuxl ddei nga a.